



Soraarnerussutisiallit pissakinnerit nammineq inigisaminniittut illuminnut 100.000 kr.-it angullugit aserfallatsaaliinissanut pisariaqartunut tigusaqarnissaannik periarfis-sinneqarnissaannut Naalakkersuisut upernaakkut 2016-imi ataatsimiinnissamut inatsisissamik saqqummiinissaannik Inatsisartut aalajangiiffigisassaattut siunnersuut.

(Inatsisartunut ilaasortaq Ane Hansen, Inuit Ataqatigiit)

(Siullermeernera)

Demokraatinut pingaaruteqarpoq nunatsinni innuttaasut tamarmik assigiinnik pisinnaatitaaffeqarnissaat. Uani siunnersuummi Inuit Ataqatigiit siunnersuutigaa, innuttaasut nammineq illullit immikkoortinneqassasut. Inuit Ataqatigiit tigussaasumik siunnersuutigaa utoqqalinersiallit namminneq illullit illumi aserfallattaalinissaannut tapiiffigineqarsinnaassasut. Tapiissut allat nammineq illullit pisinnaanngisassaat. Immikkoortitsineruvoq aamma Demokraatini tamanna ilalersinnaanngilarput.

Innuttaasummi ataasiakkaat namminneq aalajangertarpaat kissaatiginerlugu nammineq illutaarnissartik taamaattumik ataasiakkaat namminneq akisussaaffigaat illumi aserfallattaaliinerit pisariallit akilissallugit. Taamatullu oqareerluta, Demokraatini paasilluarsinnaavarput aningaasaqarniarneq oqimaannerulersinnaasartuq suliunnaarnerup kingorna. Tamanna tunngavigalugu taamaattumik iluarisimaarparput utoqqalinersiat pillugit iluarsartuussinissami siunnersuutigineqassamat utoqqalinersiallit aningaasatigut pissarsiarisinnaasaasa pitsanngoriartilluarnissaat. Utoqqalinersiallit atorsinnaalikkatik amerlanerusut pisalerunikkit illumik aserfallattaalinissaa sallinngortissinnaavaat.

Tamanna tunngavigalugu inassutigaarput siunnersuut itigartinneqassasoq.